

四庫全書

史部

欽定四庫全書

弇山堂別集卷十七

明 王世貞 撰

奇事述二

三鄂公

唐開府儀同三司鄂國公尉遲敬德宋少保萬壽觀使  
鄂國公岳飛明太子少保中書平章軍國重事鄂國公  
常遇春三公皆封鄂皆驍勇善戰稱萬人敵而勲位亦

相類常公與尉遲公俱謚忠武岳公初謚武穆後改謚亦忠武又與常公俱贈王爵

三文成

漢留侯張良謚文成明誠意伯劉基新建伯王守仁亦謚文成三公皆書生胙茅土其智略勲名略相彷彿

內閣三楊

正統初內閣三相為楊文貞士奇楊文敏榮楊文定溥號三楊以居第為別文貞曰西楊文敏曰東楊文定曰

南楊西楊以少師八十卒東楊亦以少師七十卒南楊以少保七十五卒其在閣遠者四十餘年最近者亦十六年

吏部二楊

楊文襄公一清三總制三邊長吏部加少師太子太師楊襄毅公博再總督薊遼一總督宣大長吏部亦加少師太子太師二公俱弱冠登第姓望名位俱略相當有極同者俱擅將帥之略而所至少戰功有極不同者文

襄至內閣首揆壽高於襄毅一紀而無子襄毅子多而  
且貴顯

嘉靖三楊

嘉靖中前後諫臣獨楊最楊繼盛楊爵疏最直傳天下  
而得禍俱慘爵僅獲終牖下其後同贈官賜祭爵獨缺  
諡

三文臣戰功伯爵皆王姓

文臣封伯爵前後十人然以戰功得者僅三人靖遠伯

驥威寧伯越新建伯守仁耳皆王姓威名皆盛於諸伯  
大奇大奇

東西王

王文端直文安英同舉進士為翰林庶吉士同侍讀同  
為坊長少詹禮左侍對掌制亦以居第為稱文端曰東  
王文安曰西王

吏部三王

吏部尚書凡三王文端公直至少傅太子太師年七十

八致仕以八十四卒贈太保忠肅公薨至太子太保八十四致仕以其年卒贈太保端愍公恕至太子太保七十八致仕以九十三卒贈太師三公年壽名德卹典皆彷彿又皆王姓其後王太原瓊以七十三再入吏部王陽城國光七十一尚為吏部俱加太子太保俱王姓俱山西而俱七十餘蓋五王矣若後二名德小劣所謂一解不如一解

又有奇者文端忠肅去王恭襄初為吏部及今陽城相去

正可一甲子而恭襄以前壬午謫戍陽城後壬午削職

又二王

王襄敏越以二十六舉進士累官西北以戰功積官至兵部尚書左都御史封太子太傅咸寧伯坐奸黨流徙安陸自列還鄉以太子太保左都總督陝西三邊軍務加少保太子太傅卒於位年七十三王恭襄瓊亦以二十六舉進士累官兵部尚書積軍功加少師太子太師改吏部亦坐奸黨謫戍綏德自列還鄉以兵部尚書右



都總督陝西三邊軍務加太子太保入為吏部卒於位  
年七十四二公姓同入仕之歲同才略功名年位譏諍  
事事同

又二王

正德中王恭襄公瓊為兵部尚書王康毅公憲為左侍  
郎恭襄入吏部康毅即代之世廟初同辭任康毅再起  
以尚書兼右都總制陝西三邊軍功加太子太保入長  
都察院恭襄代之亦以尚書兼右都用軍功加太子太

保入長吏部康毅後復長兵部在一時卒俱贈少保無不同者

又兩王司空

正統中有王永和者以給事中遷王永壽者以御史遷先後為工部左侍郎同署事若兄弟然永和死土木之難贈本部尚書而永壽亦於其月進本部尚書

湖廣二王徹侯

湖廣蘄水王聰孝感王忠俱從靖難聰為都指揮忠為

都督僉事同日封奉天靖難推誠宣力武臣特進柱國  
聰武城侯忠靖安侯永樂七年聰為左副將軍忠為左  
叅將同日從淇國公北征同日戰歿於臚朐河年皆五  
十餘自姓氏鄉曲年齒官爵封拜陣亡月日無不同者  
又二王封奪

永樂元年都指揮同知王友封清遠伯六年以安南功  
進封侯後以北征不遵詔下獄奪爵都指揮王通以父  
真死事封武義伯七年以山陵功進封侯後以守安南

擅棄地下獄奪爵二侯皆王姓而進封奪爵事體亦同

又二王

萬曆十二年十二月禮部右侍郎服滿錫爵吏部右侍郎王家屏同日入閣錫爵為文淵家屏為東閣俱大學士

吾州四王

萬曆壬午甲申間世貞以南大理卿還里而王禮侍錫爵給假省親不出余弟世懋與禮侍之弟鼎爵俱以提

學副使一自陝西一自河南乞歸二子生同歲同為禮部郎同歲遷提學又同歲請告而余召為刑部侍郎不赴一時頗稱之為四王者以其名位里居之相埒也余實不敢望禮侍尋召拜相余弟再補福建而鼎爵服除卒余弟轉少卿亦前卒

吾郡二吳宗伯

吾吳郡弘治中吳公寬以禮書學士東閣管誥勅嘉靖中吳公一鵬亦如之二公俱累官內翰而俱不得入相

歿俱贈太子太保俱得上謚一文定一文端今吳中人俱稱吳閭老

吾郡三陳祭酒

吾郡成化陳鑑自侍讀學士轉祭酒正德陳霽自南侍講學士轉祭酒嘉靖陳寰以司業轉祭酒祭酒儒師重職步伍八座不當止而三公同止是官又同陳姓同為吾吳人甚奇

湖廣二張

湖廣嘉靖中張公璧以太子太保東閣大學士張公治亦以太子太保文淵閣大學士在位俱踰歲加宮保不數日而病病未久而逝俱贈少保一諡文簡一諡文毅

嘉靖四張

鄞人張邦奇為吏部左侍郎蜀人張潮為右侍郎邦奇以翰林院學士掌院潮遷左侍郎兼學士同日加太子賓客未幾邦奇進禮部尚書掌詹事改南吏部潮進尚書繼之而楚人張璧以禮部尚書兼學士掌部張治以

學士進吏部右侍郎四張皆光學也而皆在一時

華亭二張

華亭張公鑒為南大司馬叅贊加太子少保後二年同  
邑張公悅繼之亦加太子少保卒追贈太子太保一諡  
莊懿一諡莊簡二公年位名德里居相近今有混以為  
一人者

江西二羅

江西成化丙戌狀元羅公倫以言事外謫後復官止修



撰贈左諭德諡文毅嘉靖己丑狀元羅公洪先亦以言  
事為民止贊善贈光祿少卿諡文恭相去一甲子地同  
大魁同言事同講學同從六品得諡同贈官從五品同  
尤奇絕

內閣二劉

正統戊辰進士壽光劉珥年二十三博野劉吉年二十  
二同為庶吉士同授編修修史經筵進秩無不同者又  
同主考己丑會試珥以吏左侍兼學士吉以禮左侍兼

學士同日入閣同日進尚書珣戶部吉禮部同日加太子少保自是加太子太保及柱國珣為謹身殿吉為武英殿皆同日最後珣致仕而吉留至少師首殿以卒然同贈三公珣得太保吉得太師同謚文珣得和吉得穆

又三劉

劉文靖健在內閣二十年正德元年以少師首揆致仕四年少傅宇由吏部入閣六日而歸省遂致仕五年少傅忠復入閣不滿歲亦歸省遂致仕三人在相位有久

速人亦薰猶但皆劉姓而皆河南人為異耳

二譚

譚姓最少而宣德間有譚廣譚青者一時同為左都督俱善將騎兵塞外人畏之俱號譚家馬青子襲指揮亦名廣

二徐

今人但知有徐晞之為兵部尚書而不知徐輝之為戶部尚書也輝在高帝時由倉部主事郎中進侍郎尚書

晞自兵部主事郎中進左右侍郎至尚書皆不歷他曹  
皆起本部小吏皆徐姓而又皆常州人一武進一江陰  
奇甚奇甚

### 四羅功名相近

羅姓非廣而英廟之代有羅凡四而俱以才略任邊事  
汝敬嘗為庶吉士斥充刑部吏又斥戍交趾未至而赦  
後以侍講改御史超拜工部右侍郎提督諸衛屯種受  
賂事發逮問論絞長係久之始出充為事官仍舊屯種

引詔徑復職復坐詐傳論斬再赦復官始致仕亨信以  
庶吉士為給事中謫充交趾吏久之後為御史超拜右  
僉都御史撫宣大累轉左副都御史皆甲辰進士通給  
事中以言事陞交趾清化州知州以不肯棄城還為戶  
部員外郎轉兵部郎中從王驥西征坐貪淫不法謫為  
廣西開官已已之難適至復官以兵部郎中超拜右副  
都御史守居庸入佐院遷右都提督操練數與于謙爭  
議後冒迎駕功三子俱官鎮撫卒三公俱年七十餘綺

以御史遷大理寺丞撫遼東謫戍召還以中書舍人進大理寺少卿使邊還以刑部左侍郎鎮松潘召佐院為左副都御史坐御史論曹石謫為廣西叅政以怨望為民再坐構訐徵下獄籍其家其姓同官職同任邊事同中間戍削起蹟又同

正統三會元

正統己未會元楊鼎以解元登第一甲第二人壬戌會元姚夔以解元登第二甲第一人乙丑會元商輅以解

元登第一甲第一人楊由侍講擢戶部右侍郎轉左進  
尚書加太子少保致仕卒贈太子太保諡莊敏姚由吏  
科給事中擢禮部右侍郎轉左以吏部進禮部尚書改  
吏部加太子少保卒贈少保諡文敏商由侍讀進學士  
入內閣擢兵部左侍郎尚書改戶部進文淵閣大學士  
改吏部加太子少保謹身殿大學士以少保致仕卒贈  
太傅諡文毅三公連三科皆以己巳年起拜俱不歷卿  
寺館幄而名位科甲商尤勝絕又與姚俱嚴郡尤為奇

也

文武二姓名

嘉靖未有錦衣衛指揮文承武太倉衛指揮使武尚文  
承武貴妃兄也尚文死受旌古有祖孝孫孫榮祖與此  
皆可作對

湖廣一時之奇

國朝文臣無至三公而獨張文忠居正加太傅至太師  
進勲上柱國辭歿以為贈錦衣緹帥無至公孤者而獨



陸武惠炳加太保兼少傅保傅相兼歿贈忠誠伯方外  
雜流無至公孤封爵者而陶仲文至少師少傅少保封  
恭誠伯歿諡榮康惠肅文臣至三公三少相兼得四字  
諡皆曠代絕典而生時恩禮隆重權勢薰灼亦近世所  
無歿而不終後追削官諡盡除其子弟官以至籍歿無  
不同者然皆楚人張為荊州陸為承天陶為黃州而首  
尾三十年內尤奇

丁丑三伯讀卷

讀卷文臣事也與貂蟬無與而丁丑一試內閣則武功  
伯徐有貞禮部則興濟伯楊善兵部則靖遠伯王驥皆  
奉天翊衛推誠宣力文臣特進光祿大夫柱國大奇

胡端敏李康惠名位

胡端敏公世寧與李康惠公承勛同舉進士同為南京  
刑部主事郎中相切磋為經濟學旁及古文經術同時  
為江西屬府知府招捕大盜起功名胡公僅一轉兵備  
副使同時超按察使胡言事戍至嘉靖初同日轉都御

史胡以僉都撫四川李以副都撫遼東後同歲為南京  
尚書胡刑部李工部尋以同月胡改北刑部李改北吏  
部中途胡改都察院李改刑部俱加太子少保明年李  
進太子太保改兵部尚書提督團營又明年胡公改兵  
部尚書亦進太子太保致仕卒其又明年李公卒贈俱  
少保凡上之眷注優禮與才望聲實無不同者而其與  
張桂諸貴人意合亦同

江西三功臣

寧王宸濠之反按察副使胡端敏公世寧發其謀副都御史孫忠烈公燧殉其節副都御史王文成公守仁成其功然皆浙人同舉於鄉者也是歲為弘治壬子場中若有大聲云三人做好事然則非偶然矣

甲子二相

嘉靖甲子少師華亭徐公階居首揆而常熟嚴公訥興化李公春芳次之三公皆南直隸人嚴李二公同日應制撰文同日進學士同日加太常少卿同日轉侍郎同

日轉吏禮部尚書同日入直同日加太子太保同日進內閣又同有老父母同於林下侍養以終今年甲申同歲捐館蓋無所不同者

二故侯

太子太保征蠻將軍成山侯王通以擅棄交趾下獄論死久之出為都督同知鎮山陵總兵官鎮遠侯顧興祖以從駕不死難下獄出為都督同知鎮紫荆皆景帝初即位時事也皆失侯而皆無他功狀成山死後始復為

伯鎮遠遇赦復侯

倫氏三元

倫氏科第之盛已具盛典中諭德文叙中會元狀元通  
叅以諒中解元矣而祭酒以訓復以解元及第第二人  
是父子合三元而羸其二也

丙辰甲戌狀元

正統丙辰狀元周旋弘治丙辰狀元則朱希周正德甲  
戌狀元唐皋萬曆甲戌狀元則孫繼皋攷景泰甲戌狀

元則孫賢尤為奇絕

丁丑狀元

正德丁丑狀元舒芬字國裳授修撰之未幾以諫南幸  
謫外召復官卒萬厯丁丑狀元沈懋學字君典授修撰  
之未幾以上書諫張相丁憂不合移病歸卒二公才氣  
略相同而修撰皆無滿任壽皆四十二

輸粟三元

嘉靖乙丑廷試第一人范應期丁丑會試第一人曹大

章成化丙午順天鄉試第一人羅玘皆以輸粟入國子  
監者大章廷試復第二人而與應期官皆不達玘入翰  
林以文行顯至大官其後正德丙子為周光宙嘉靖戊  
子為馬一龍辛卯為馬從謙庚子為沈紹慶戊子為王  
衡而皆中順天皆南直人

嘉靖二真人

嘉靖中道士邵元節賜號真人掌道教至禮部尚書賜  
蟒衣玉帶諡文康榮靖道士陶仲文亦賜號真人掌道



教至禮部尚書加三孤封伯謚榮康惠肅壽皆八十二而四字謚千古所無二人偕得之後亦同日削奪

大科更易

洪武丁丑取中狀元陳郊等五十一人俱不刻登科錄而親試中韓克忠等六十一人言者謂考試官劉三吾等有私俱下獄故也永樂己丑覆取會試下第者熊檠金庠等十餘人以考試官侍講鄒緝等出孟子尚書題誤故也弘治己未預行場中學士程敏政不得閱卷徐

經唐寅不得取以有論敏政鬻題故也嘉靖甲辰進士  
徐汝孝翟汝儉彭謙焦清等并考試官學士江汝璧等  
俱逮問除名登科錄削汝孝等不錄以言官論徇私故  
也

甲辰二會元

成化甲辰會試第一名儲璫南直隸人仕至戶部左侍  
郎改南吏部左侍郎卒諡文懿嘉靖甲辰會試第一名  
瞿景淳亦南直隸人仕至南吏部右侍郎改北禮部左

侍郎卒亦謚文懿

紹興二首甲

嘉靖丙辰紹興狀元諸公大綬榜眼陶公大臨同里閑  
為婚姻諸自禮部右侍郎為吏部右侍郎翰林院侍讀  
學士修實錄經筵日講官以萬厯元年卒贈禮部尚書  
陶亦自禮侍代之銜位贈謚無不同者以二年卒贈官  
亦同尋己未狀元丁公亦自禮侍代之僅一轉而卒贈  
官亦同三人後皆有謚陶得文僖丁得文恪諸最後得

文懿

蒲州三孤

蒲州楊公博以少師居吏部王公崇古以少保居兵部  
張公四維以少傅居內閣分秩三孤皆密戚也可謂盛  
而奇者

全州二相

廣西之全州僻州也蔣文定冕以成化丁未登第官至  
少傅太子太傅戶部尚書謹身殿大學士六十二致仕

卒贈少師呂文簡調陽以嘉靖庚戌登第官亦至少傅  
太子太傅吏部尚書建極殿大學士建極即謹身六十  
三致仕卒贈太保二公為時相首輔名位權力亦同而  
文定之自樹立負矣

餘姚二相

餘姚謝文正遷成化乙未及第四十七以少詹學士入  
閣丙寅五十八以少傅太子太傅禮部尚書武英殿大  
學士致仕同邑呂公本嘉靖壬辰進士相去將一甲子

四十六以祭酒改少詹學士入閣庚申五十七以少傅  
太子太傅禮部尚書武英殿大學士丁憂俱為第三相  
者十二年謝公八十二終呂公今年八十二尚無恙

文正之初推也凡六人太子太保吏部尚書耿裕居首  
禮部尚書倪岳次之右侍郎兼學士李東陽又次之吏  
部左侍郎周經又次之禮部右侍郎傅瀚又次之文正  
居末與第三人李公同用李長沙人也李公本初推亦  
太子太保吏部尚書聞淵居首南京吏部尚書張治次

之吏部左侍郎學士徐階又次之南京兵部尚書韓邦奇又次之禮部侍郎歐陽德又次之李公居末與第二人張公同用張亦長沙人也其巧符乃爾

寧波二相

寧波舊無大拜者自嘉靖至萬曆二十餘年中而有兩相曰袁文榮公煒余文敏公有丁皆進士第三人而余為袁所取士則衣鉢也官皆至少傅太子太傅戶部尚書建極殿大學士無一字不同晚途皆甚速而又皆不

久壽皆至五十八病亦相類皆好聲酒為懽樂

三庚戌宗伯非由翰林

永樂以後禮部尚書如鄭賜李至剛趙莊呂震胡濙石瑁姚夔鄒幹輩皆不必翰林至周文安洪謨始以翰林得之遂為故事矣獨景泰中楊尚書寧以宣德庚戌進士嘉靖初席尚書書以弘治庚戌進士萬厯中徐尚書學謨以嘉靖庚戌進士皆不由翰林而皆庚戌皆以他部侍郎陞大司



# 四長史

景泰在邸邸時左長史曰儀銘右長史曰楊翥銘至太子太保兵部尚書掌詹事府卒贈太師諡忠襄而翥先致仕僅加銜禮部尚書而止世宗在興邸左長史曰張景明右長史曰袁宗皋宗皋至禮部尚書文淵殿大學士贈太子太保諡榮襄而景明先卒僅贈尚書大學士四史榮悴大略相同

## 二陳司馬

天順間陳汝言以附太監吉祥忠國公亨冒南城功驟遷至兵部尚書成化間陳鉞以附太監直保國公永冒邊功驟遷至兵部尚書俱有寵招納權賂不踰年而敗汝言死於獄鉞為編民汝言之寵幸威焰無禮甚於鉞其禍亦慘於鉞然其姓同所依附及爵位出處亦同

## 二馬都督

天順間馬良者貌溫麗少以幼童侍青宮既即位有龍陽之幸襲父職為金吾指揮使累戰功為都指揮南城

反正召見之進都督僉事平曹欽進都督同知賜繡蟒衣玉帶凡行幸必從賞賚不貲一日上出獵南海子早朝罷文武羣臣候送午門外見有乘馬從中門諸璫夾而出者以為上也最後上騎而出蓋前騎者良也良喪婦不數月而娶鼓吹達禁中上知之恚曰奴薄行乃爾耶自是不復召至成化初坐與中官王綸有連出廣東從大帥自效正德間馬昂者宣府指揮也累戰功至都督僉事總宣府兵有女弟已適畢指揮有娠矣美艷善

騎射曉番語上聞而召嬖之甚遂進昂右都督一門大小皆賜衣蟒諸大璫皆畏之呼為馬舅臺諫皆有言不聽一日上過昂賜第飲酣欲召幸其妾昂不可上怒而起昂懼請解任女弟亦踈二人姓氏官爵恩倖見踈俱絕相類然良後協贊南京守備鎮守廣西貴州以功名終而昂奪職死其弟都督昊都指揮晁昊皆得罪

### 南直隸六相相克

吾南直隸輔臣在林下者少師徐公階李公春芳太子

太保嚴公訥萬歷中少師申公時行大拜久之徐公薨已少保許公國大拜未幾李公卒俄而嚴公亦卒吾州王公錫爵復大拜林下遂無一人而三人者皆在閣矣

文武互用之極

王靖遠驥王威寧越皆以進士累官尚書左都御史而一挂平蠻將軍印一挂平胡及靖虜副將軍印蓋不止總督而已也李曹公文忠以左都督而兼掌國子監祭酒王新建守仁以戰功封爵而從祀孔廟楊興濟善以

布衣散曹而位左都御史封伯遂兼掌禮部及左軍都督府其事至奇故特標著之

任子官位大於所由

國朝重科目一途任子多不得大位獨燕府左長史朱復以二品後五品終任子濬為北京行部尚書二品禮部左侍郎儀公智三品任子銘至太子太保兵部尚書一品翰林學士呂公原五品任子憲至南京太常寺卿三品少詹事劉文恭公鉉任子榮至太常寺卿掌尚寶

司三品浙江按察副使陶公成四品任子魯至廣東右  
布政使二品南京工部右侍郎黃公孔昭任子綰至禮  
部尚書兼翰林學士二品江西按察司副使許公達四  
品任子場至錦衣衛指揮使管衛事三品右副都御史  
孫公燧三品任子堪至都督僉事二品堪任子鈺至都  
督同知一品品秩皆過於所自一奇也儀銘累任翰林  
又以尚書掌府黃綰為詹事學士咸極清華之選二奇  
也儀贈官至特進左柱國太師階勳位秩遂冠人臣三

奇也陶復轉蔭子孫至錦衣千戶世襲四奇也

兩任子改翰林給事之異

宣德中儀侍郎智子銘以蔭為給事中後改翰林檢討  
進修撰再進侍讀金殿學幼孜子達以蔭為檢討後改  
給事中轉左右至兵科都給事中其相反可謂奇矣正  
德初許侍郎進入兵部子誥以給事中避言路改檢討  
與金達事亦相反


三唐狀元皆戌科



國朝唐姓狀元僅三人其一為侍讀學士唐臯係正德甲戌歷丙戌戊戌而至嘉靖庚戌為太常少卿唐汝楫又歷壬戌甲戌而至萬歷丙戌為今翰林修撰唐文獻奇甚

一母孕兩狀元

普江王懷中言長樂馬某娶妻有子鐸而妻妬不容嫁之同邑李氏生子騏初曰馬後鐸中永樂壬辰科狀元騏中戊戌狀元



弇山堂別集卷十七

欽定四庫全書

史部

弇山堂別集卷十八

九

詳校官編修<sub>臣</sub>李潢

編修<sub>臣</sub>裴謙覆勘

總校官中書<sub>臣</sub>朱鈐

校對官中書<sub>臣</sub>李槃

謄錄監生<sub>臣</sub>俞成鰲

欽定四庫全書

弇山堂別集卷十八

明 王世貞 撰

奇事述三

己卯壬午之際

文皇靖難師在己卯秋寧庶人作難亦在己卯秋相  
去正得二甲子文皇之起以都督三司謝讎伏兵倖繫  
之寧庶人亦然豈偶合耶抑有所借襲也其用李士寶

為太師國公劉養正為軍師却似有取於韓公誠意同  
姓然高皇之帝業成於鄱陽一戰而庶人却敗於其地  
則大相反矣文皇以壬午入紹世廟以先一歲入紹而  
亦以壬午改元帝王自有真所謂妙合者固不在彼而  
在此也

兩壬午風水之變

萬曆十年壬午秋七月丙辰朔十三日戊辰至次日已  
巳大風雨拔木江海及湖水俱嘯湧吾州常熟崇明嘉

定吳江等處漂沒室廬人畜以萬計考之實錄嘉靖元年壬午秋七月乙巳朔二十四日戊辰至次日己巳大風雨江海嘯湧漂沒室廬人畜亦如之以余所見及野史所載是日俱有龍火之異前壬午禍微輕而遠後壬午禍甚慘而狹要之六十年內所無也今人知其週一甲子耳不知其干支正同蓋無一日之贏欠也異哉異哉

戶口登耗之異

國家戶口登耗有絕不可信者如洪武十四年天下承元之亂殺僇流竄不減隋氏之末而戶尚有一千六十五萬四千三百六十二口五千九百八十七萬三千三百五其後休養生息者二十餘年至三十五年而戶一千六十二萬六千七百七十九口五千六百三十萬一千二十六計戶減二萬七千五百八十三口減三百五十七萬二千二百七十九何也其明年為永樂元年則戶一千一百四十一萬五千八百二十九口六千六百



五十九萬八千三百三十七夫是時靖難之師連歲不  
息長淮以北鞠為草莽而戶驟增至七十八萬九千五  
十餘口驟增至一千二十九萬七千三百十一又何也  
明年戶復為九百六十八萬五千二十口復為五千九  
十五萬四百七十比之三十五年戶却減九十四萬一  
千七百五十九口減五百三十五萬五百五十六又何  
也九年戶九百五十三萬三千六百九十二口五千一  
百四十四萬六千八百三十四十年戶一千九十九萬

二千四百三十六口六千五百三十七萬七千六百三十  
十僅一年耳而戶忽增一百四十五萬八千七百四十  
四口增一千三百九十三萬七百九十六當是安南新  
入版圖其戶口之數至十年始上冊籍耳然十一年戶  
復為九百六十八萬四千九百一十六計減一百三十  
萬七千五百二十口復為五千九十五萬二百四十四  
計減一千四百四十二萬七千三百八十六又大不可  
曉也自是休養生息者五十年而為天順七年戶僅九

百三十八萬五千一十二口僅五千六百三十七萬二百五十比於舊有耗而無登者何也然不一年而戶為九百一十萬七千二百五減二十七萬七千八百七十二口為六千四十七萬九千三百三十增四百十二萬九千八十其戶口登耗之相反又何也成化中戶不甚懸絕二十二年而口至六千五百四十四萬二千六百八十此盛之極也二十三年而僅五千二十萬七千一百三十四一年之間而減一千五百二十三萬五千五

百四十六又何也弘治十七年口至六千一十萬五千八百三十五十八年戶至一千二百九十七萬二千九百七十四此又盛也不二年而為正德元年戶僅九百一十五萬一千七百七十三減三百八十二萬一千二百一口僅四千六百八十萬二千五十減一千三百三十萬三千七百八十五又何也自是而劉六等亂中原藍鄆等亂楚蜀江廣無處不被兵而八年以後口却增至六千三百三十餘萬又何也然則有司之造冊與戶

科戶部之稽查皆屬兒戲耳

烈婦俱妾媵

國家令典於婦人女子能夠夫死者俱有旌異然考之  
實錄洪武七年九月中書平章政事李思齊卒妾鄭氏  
自經死十七年正月安陸侯具復卒妾楊氏自經死俱  
贈淑人諡貞烈又燕山中護衛指揮使費愚卒妾朱氏  
自經死贈德人諡貞烈德人即恭人也永樂二十一年  
正月成安侯郭亮卒妾韓氏自經死贈淑人宣德四年

二月中軍左都督馬聚卒妾陳氏自經死左軍右都督  
冀傑卒妾王氏自經死俱贈淑人三月陝西都指揮使  
王俶戰歿妾時氏自經死贈淑人諡貞烈八年三月忠  
義右衛鎮撫李壽卒妾趙氏自經死贈宜人八年四月  
大同左衛指揮使范安卒妾楊氏自經死贈恭人九年  
二月武安侯鄭亨卒妾張氏自經死贈淑人正統六年  
五月中軍都督僉事胡榮卒妾陳氏自經死贈淑人景  
泰二年九月昌平侯楊洪卒妾葛氏自經死贈淑人三

年正月豐城侯李賢卒妾余氏自經死贈淑人已上凡  
十有三而勛戚大臣之妻殉死者無一二也豈妾獨厚  
而妻獨薄耶意者有吕后袁紹夫人之妬而出於不得  
已也又自憲宗而後旌典歲有之而未聞有勛戚之家  
及為妾者又不可曉故特紀於此

師生同賜下諡及改諡

嘉靖六年大學士石珪卒上親定諡曰文隱取勤學好  
問違拂不成為義也至二十九年大學士張治卒上復

親定謚曰文隱則取勤學好問懷情不盡為義蓋國朝謚文隱者惟二人皆在內閣不久而張公又石公會試所取第一人也以後二公皆改謚一文介一文毅

奪情與冊同

成化丙戌少保大學士李公賢丁父憂奪情辭不允僅三日冊貴妃萬氏賢妃柏氏會昌侯孫繼宗與公同為正使萬歷丁丑少師大學士張公居正憂奪情明年冊皇后王氏英國公張溶為正使公為副使其事之巧符



若此

衍聖真人同坐事

成化丙戌三月癸卯衍聖公孔洪緒坐姦淫樂婦四十  
餘人勒殺無辜四人法當斬詔以宣聖故削爵為民以  
弟洪泰代沒後洪緒子聞韶襲爵四月戊午正一嗣教  
大真人張元吉坐僭用器物擅易制書強奪子女先後  
殺平人四十餘人至有一家三人者法當凌遲處死下  
獄禁錮尋杖一百戍鐵嶺而子玄慶得襲元吉竟以母

老放歸弘治戊午闕里文廟災真人府亦災凡二氏之品秩應朝給賜無不同者至禍譴亦同何其異也

大學士尚書掌別部

嘉靖末太子太保兵部尚書楊博不理部事而出總督宣大薊遼工部尚書朱衡不理部事而總理河漕又不開缺刑部尚書鄭曉不理部事而代博理兵部隆慶中內閣少師大學士高拱太子太保大學士趙貞吉俱不輟閣務而掌吏部都察院後拱為內閣首臣而掌吏部

故部見有少傅尚書楊博不令掌而掌兵部亦時事一變也

癸丑壬戌三及第之異

嘉靖壬戌一科首甲三人申時行王錫爵余有丁皆大拜位師傅已見盛典矣其最不顯而又最不利者無如嘉靖之癸丑其明年第三人溫應祿舉家疫死又明年第一人陳謹被逮謫推官累遷至右中允丁憂歸為亂卒所毆死後第二人曹大章以編修廢疾罷復用脅受

商人財削職為民二科榮辱之相反如此按洪武丁丑  
廷試三人尤為不祥狀元陳郊劉鶚責徙昌化安置取  
回為鴻臚寺司賓署丞尋俱殺之惟尹昌隆為禮部主  
事永樂初改春坊右中允亦下獄賜死其覆取進士內  
僅狀元韓克忠至按察僉事餘二人俱終本官

福建大魁無顯者

福建自開科至宣德間最多高第以後寥寥矣然少顯  
貴者狀元則乙丑丁顯丁丑陳郊丙戌林環壬辰馬鐸

戊戌李騏庚戌林震辛未柯潛丙戌龔用卿癸丑陳謹  
凡九人僅柯至少詹事龔至祭酒四品而已陳至右中  
允餘俱修撰皆夭而郊僅為司賓署丞以不令終會元  
則壬辰林誌乙未洪英辛丑陳中庚戌傅夏器己未蔡  
茂春五人惟洪至右都御史及第者戊辰唐震辛未張  
顯宗丙戌陳全辛卯黃暘壬辰林誌乙未李貞陳景著  
丁未謝璉庚戌林文癸丑趙恢壬辰李仁傑戊辰戴大  
賓凡十二人僅謝璉至侍郎林文太常少卿仁傑祭酒

張顯宗曾為侍郎終交趾布政而已無論閣部一品俱不可得今已未及第林宗伯士章始破天荒矣

甲榜非正科

國朝科甲以丑辰戌未為正而洪武開科之歲進士吳伯宗等則辛亥也永樂壬午靖內難明年癸未始鄉試甲申賜進士曾棨等己丑會試中陳璉等上北征辛卯賜進士蕭時中等天順庚辰試場火秋會試中吳鉞等甲申賜進士彭教等正德庚辰會試中張治等上南巡

明年新帝登極為辛巳賜進士楊惟聰等凡五科非正科而兩皆甲申最後辛巳相去亦三年

丙戌己未無內閣冢宰

國朝諸科第往往有通無內閣冢宰者而三丙戌為永樂為成化為嘉靖又三己未為正統為弘治為嘉靖凡六科唯丙戌有冢宰屠襄惠浦一人餘皆無之亦奇事也

吏部尚書首推內閣不得用

弘治乙卯以前內閣大臣皆特簡不從廷推至乙卯始  
廷推太子太保吏部尚書耿裕為首正德辛未少保吏  
部尚書楊一清為首甲戌一清復為首嘉靖己酉太子  
太保吏部尚書聞淵為首萬曆甲申吏部尚書楊巍為  
首皆不用而用翰林之次及後者

天子義兒

高帝時曹國公李文忠西平侯沐英大都督同知何文  
輝都督僉事徐司馬元帥朱文剛朱文遜武宗時永壽



伯裴得安邊伯許泰平虜伯江彬左都督劉暉左都督  
神周右都督張洪都督僉事李琮其餘又數十人錢寧  
投刺至自稱曰皇庶子

三殺降之報

高廟初徐中山達常開平遇春破陳友諒兵於池州生  
擒三千餘人遇春欲悉殺之達不可以聞上上命釋為  
兵使者返則遇春以其夕悉殺之矣存者僅三百人上  
不憚放之歸然竟不以罪遇春也文皇靖難時破李景

隆隆兵三百騎上命釋留宿衛胡騎指揮星吉一夕盡  
殺之又於滄州破南師獲卒萬人皆給牒放歸會日暮  
有未給者三千餘人指揮譚淵悉殺之上維切責淵吉  
而惜其功亦不罪也然不旬日內淵吉皆戰沒常公雖  
建開國勲而四十遽夭二子嗣爵皆不終李廣虞詡之  
恨豈欺我哉

靖難二元功不利大帥

永樂從靖難者僅封二大國如丘洪公福朱成公能皆

元功然未常別將大兵也永樂五年成公一受賑拜征夷將軍統十二將軍兵八十餘萬征交趾入境以病歿八年淇公一受賑拜征北大將軍統四將軍兵十萬騎征布尼雅實哩入境即敗沒二公之不利大帥如此

五元功皆不利

太祖開國元功文臣太師韓國公李善長以嫌賜死太宗靖難元功太子太師淇國公丘福北征敗沒削爵全家謫海南景帝登極元功兵部尚書于謙讒僂天順復

辟元功武臣忠國公石亨下獄論斬文臣大學士徐有  
貞下獄流金齒世宗入繼元功大學士楊廷和奪官遂  
無一利者

四橫緹帥皆不終

自錦衣衛典詔獄領刺事官校張權者四人皆不終永  
樂紀綱為都指揮僉事凌遲處死族滅家籍天順門達  
為都指揮僉事遠戍家籍正德朱寧為左都督凌遲處  
死族滅家籍嘉靖陸炳為太保左都督死後削奪諸子

流徙家籍

二黃中貴

成化中司禮監太監黃賜以與汪直不合出掌南京守備正德中司禮監太監黃偉以與劉瑾不合出掌南京守備二黃皆以司禮大璫出行業老成稍為人所重然富貴之極南中往往互稱不能別

四張中貴

正德末御用太監張永總督團營御馬太監張忠佐之

司禮太監張銳管監事御馬太監張雄提督東廠四人俱藉寵有聲而權術亦相埒時錦四張雄父亦名銳初不欲迎養以母勸召而庭撻之二十始相哭為父子已積功即日奏為右都督

又三張中貴

萬曆十一年張宏長司禮監張誠次之掌御用監督南海子張鯨又次之兼掌東廠時稱三張宏死誠代長司禮鯨次之兼掌東廠張朝復次之亦三張也

振瑾二賢

國朝中官握政本亂天下者無甚於王振劉瑾其事權  
絕相類振在樞筦最久然其橫惡至乙丑丙寅以後而  
極已己屠裂土木瑾以丙寅流毒庚午劓於燕市家族  
皆誅夷籍沒相去甲子同瑾僅後一年耳當振瑾之橫  
英國公張輔及子嗣公懋俱以太師勛臣班首日與周  
旋而免挫辱

張永功名前後相埒

正德寧夏安化江西寧王之亂中貴人張永一則以總督專征一則以提督贊畫扈駕皆兵未至而亂平事後處置皆屬之永一則善楊文襄一則善王文成無損功名歸後一則首誅逆瑾一則與誅逆彬先後脗合大奇大奇

同官相去科第懸絕

楊少保溥與曹學士鼎同相楊建文庚辰曹宣德癸丑相去三十三年陳少保循高少保穀與商兵侍輅同相



陳高永樂乙未商正統乙丑相去三十年楊少師一清  
謝少傅遷與張少保璉同相楊成化壬辰謝成化乙未  
張乃嘉靖辛巳也楊與張相去四十九年謝與張相去  
四十六年楊又與桂少保萼同相相去三十九年嚴少  
師嵩與袁少保煒同相嚴弘治乙丑袁嘉靖戊戌相去  
三十三年徐少師階與李少傅春芳同相徐嘉靖癸未  
李丁未相去二十四年胡少傅濙與楊公寧同為禮部  
尚書胡庚辰楊庚戌相去亦三十年胡公庚辰左侍郎

姚夔以正統壬戌相去四十二年王太宰直以永樂甲申左侍郎項文曜以正統乙丑相去四十餘年桂少保萼以正德辛未繼謝少傅相去三十六年夏少傅言以正德丁丑繼費少師宏相宏丁未相去三十年

功名遲速懸絕

吉水解大紳縉自翰林待詔不二年而為左春坊大學士兼翰林院學士其所取同邑劉子欽以解元會魁高第幾五十年而自戊所起為學官終身邢寬為狀元近

三十年始得南院講學而曹文忠鼎為狀元十年彭文憲公為狀元一年商公為狀元四年即入內閣商又三載為兵侍學士而庚戌及第林文猶為修撰戊戌庶吉士尹鳳岐以侍講剝員卒家山陰胡惠為刑部主事三十年不遷張文忠孚敬桂文襄夢俱以主事之次年拜學士又四年至極品遲速之不同如此

生產右腹及肋

產不由戶者釋氏以為世尊及轉輪聖王之瑞而儒者

以為必無之事而實未必然成化十八年鳳陽宿州民張真妻王氏孕當產臍下右痛不可忍凡三月而增劇至三月一日亥時腹畔右開裂生一男鼻準中有黑痣一巡按御史周蕃上其事於朝而祝京兆記之尹文和直瑣綴錄又云二十年徐州一婦初孕肋骨下即生一溜漸長如核大久之皮亦瑩薄兒遂從此產有司具聞月給膳米直往來徐州見之此豈一事耶然所傳不同而皆有據嘉靖末真定屬城有婦人於右肋產一男甚

雄偉然六歲死而前二人至長不聞有異天地大矣何  
所不有

中國夷官互居

權貴妃父光祿卿永均任順妃父鴻臚卿添年李昭儀  
父光祿少卿文呂婕妤父光祿少卿貴真崔美人父鴻  
臚少卿得罪皆朝鮮人也雖貴至列卿而尚居朝鮮至  
宣德中永均以訃聞賜白金米布又琉球國相程復饒  
州人也自言相其王四十年年八十乞致仕歸饒州許

之命以國相兼左長史賜四品誥夷人以中國官居夷而中國人以夷官居中國亦異事也又宣德中蘇門葛刺國王弟哈刺之漢入朝病卒贈鴻臚少卿賜葬

外國人進士

洪武辛亥高麗國人入試者三金濤登三甲第五其國之延安人也授山東安丘縣丞歸為其國相景泰五年甲戌進士黎庸交趾清威人阮勤多翼人勤仕至工部左侍郎天順四年庚辰阮文英慈山人何廣扶寧人成

化五年己丑王京嘉靖二年癸未陳儒俱交趾人儒仕至右都御史

夷女得尚帝王

高帝聘庫庫特穆爾女氏為秦王妃永樂中權貴妃任順妃呂婕妤崔美人皆朝鮮所貢女

女官

余嘗於宛委餘編記女官若國初六尚之職舊嘗取寡婦及幼女之知書者為之然皆典內職非文銜建昌知

金史卷八十八  
府師克武定知府商勝東川知府勝古烏撒知府實卜  
皆洪武中土官代其夫與父者也後不可勝紀

樛人妻

水東日記載宣廟賜御用太監王瑾夫人二人又正統  
中鎮守遼東太監王義死命太監喜寧視其家因掩有  
其貨寶財物田產義妻馬氏奏之詔以田產給其家餘  
悉入官天順初賜故太監吳誠妻南京第宅莊田成化  
中御馬監左監丞龍閏娶故南和侯方瑛妾許氏為妻



事發詔離異仍命司禮監治之

內臣嗣子

太監劉永誠以從子寧晉伯劉聚為後官左都督特封其高曾祖而不及父左司直兼編修李泰考滿上疏言臣為伯父司禮監太監永昌子不得封生父母請封祖父母以展孝思從之泰與牛輪登科錄俱注伯父司禮監太監永昌左監丞玉而俱入翰林泰至詹事府詹事兼侍讀學士輪至太常少卿兼侍讀

同姓同諡

文臣姓諡相同者刑部侍郎贈少傅馬京禮部右侍郎  
兼學士贈尚書馬汝驥同諡文簡少師贈太師張孚敬  
太師贈上柱國張居正同諡文忠少保太學士贈太保  
毛紀太子太傅禮部尚書贈少保毛澄同諡文簡翰林  
院侍讀學士贈學士張益太子太保禮部尚書贈太子  
太傅張昇同諡文僖太子太保大學士贈少保張治少  
師大學士贈太師張四維同諡文毅禮部左侍郎兼學

士贈尚書劉定之南京兵部尚書贈太子太保劉龍同  
謚文安禮部左侍郎贈尚書王瓚吏部右侍郎王道同  
謚文定太子少保南京吏部尚書吳一鵬少保太子太  
保禮部尚書翰林院學士吳山同謚文端少傅大學士  
贈太保劉忠南京禮部右侍郎贈尚書劉瑞同謚文肅  
南京刑部尚書贈太子少保方良永戶部尚書贈太子  
少保方鈇同謚簡肅少保太子太傅都察院左都御史  
贈太傅王越太子太保兵部尚書贈少保王以旂同謚

襄敏都察院右副都御史贈右都御史鄧榮左都御史  
鄧廷瓚同諡襄敏太子少保都察院左都御史李賓太  
子少保吏部尚書贈太子太保李秉南京兵部尚書贈  
太子少保李遂同諡襄敏太子少保工部尚書贈太子  
太保王復南京兵部尚書贈太子少保王學夔同諡莊  
簡其武臣姓諡同者平陰伯朱崇撫寧侯朱謙俱諡武  
襄漳國公王聰右都督王効同諡武襄駙馬都尉富陽  
侯李讓太子太保襄城伯李全禮安昌伯錢承宗會昌

伯錢杲同謚榮僖清平侯贈渠國公吳成恭順侯贈邠國公吳克忠同謚壯勇

按二毛文簡一時為學士為內閣禮部清德相望二王襄敏俱長中臺節制全陝三邊二吳壯勇俱以番將賜姓殉節一時尤奇

文武臣姓謚同者南京吏部尚書贈太子太保朱希周太師成國公贈定襄王朱希忠同謚恭靖右都御史贈少保王璟鎮撫贈右都督王忠俱謚恭靖興府長史贈

太子少保大學士張景明少師隆平侯贈鄖國公張信  
同諡恭僖太子太保戶部尚書贈少保孫交太保會昌  
侯孫果同諡榮僖

爵諡相類

諸王及武臣侯伯之爵有類於諡者今附記之不然亦  
以為諡也永樂十五年安惠王又肅莊王成化十三年  
襄憲王嘉靖十九年德懿王二十年崇善恭順王二十  
年定安懷簡王四十四年惠安宣懿王載塾永樂十五

年贈成武伯陳亨諡忠壯宣德五年贈安順侯薛貴諡  
忠壯景泰五年贈忠勇侯蔣信諡僖順天順六年贈文  
安侯張輓諡忠僖成化八年贈定襄侯郭登諡忠武十  
年贈靖安侯和勇諡武敏嘉靖十四年惠安伯張偉諡  
靖襄四十三年贈忠誠伯陸炳諡武惠萬厯元年贈定  
襄王朱希忠諡恭靖按定襄文安靖安猶地名其他故  
稱美也惠安以下似四字諡若陶仲文之恭誠榮康惠  
肅伯則似六字諡而和勇又似併爵名而為六字矣

又武定侯郭英諡威襄武安侯鄭亨諡忠毅恭順侯吳克忠諡壯勇恭順侯吳瑾諡忠壯武靖侯趙輔諡恭肅然易以國封公爵

此外如忠勤伯汪廣洋李賢忠誠伯茹瑺昭武伯曹欽及忠節侯張子明永義侯桑世傑義惠侯劉繼祖蓋直以為號而不別諡也汪如曹皆削

大臣名與諡類

李歧陽文忠諡武靖此外如大都督朱文正伍大司馬



文定張大司空文憲亦然

人主廟號諡號相犯

廟號之相犯者仁祖之與仁宗諡與廟號之相犯者睿  
皇帝之與睿宗

親王大臣犯廟諡

廟號定而臣下之諡有犯者如懿祖之後有周王子墜  
申王祐楷鄭王祐檠代王俊杖德王祐榕與太子之懿  
文世子之懿莊文臣則呂原楊守陳諸大綬之文懿張

鵬之懿簡周瑄張瑩胡拱辰閔珪之莊懿陳俊徐貫林  
庭棹之康懿成祖之後有唐王彌錦蜀王讓相文臣則  
王守仁之文成宣宗之後有秦王懷瑾文臣則黃福劉  
大夏之忠宣憲宗之後有藩王楸移淮王厚燾文臣則  
宋濂費宏之文憲聖謚定而臣下之謚有犯者如昭皇  
帝之後有秦王秉榘蜀王賓瀚韓王旭樾代王克燿肅  
王縉烜益王載增文臣則江瀾之為文昭敬皇帝之後  
有伊王訐淳唐王宇溫毅皇帝之後有傅珪羅倫黃孔

昭張治之文毅李桂之毅勇劉玉之端毅許進潘鑑王  
邦瑞彭澤楊博之襄毅王憲之康毅肅皇帝之後有劉  
瑞趙貞吉之文肅林俊之貞肅顧佐梁材葛守禮之端  
肅潘璜方鈺方良永陳瓚之簡肅莊皇帝之後有衡王  
厚燾文臣則馬自強之文莊王學夔之莊簡了不以爲  
嫌也若文皇帝之爲文武皇帝之爲武與郡王妃主之  
諡之犯者又不可勝紀矣

弇山堂別集卷十八

欽定四庫全書

弇山堂別集卷十九

明 王世貞 撰

奇事述四

大臣更名

宋公馮勝初名國勝次更為宗異最後名勝西平侯沐  
英初名文英豫章侯胡美初名廷瑞衛國公鄧愈初名  
友德東勝侯汪興祖初名同魏國公徐輝祖初名允恭

至孫國公顯宗初名長子翰林待制王禕初名偉又名瑋御史大夫陳寧初名亮中書左丞楊憲初名昇都督汪興祖初名同劉學士三吾初名昆孫駙馬黃琛初名寶蹇忠定義初名瑤齊大司馬泰初名德胡文穆廣以及第改名靖後復名廣楊文敏榮初名子榮劉忠武榮初名江王毅愍文初名强李狀元騏初名馬王祭酒恂初名振徐武功有貞初名珵姚少師廣孝初名道衍沐黔國公斌初名儼王尚書繼初名維毛南寧伯勝初名

福壽會昌侯孫銘初名鎮劉尚書中敷初名中孚胡方  
伯德盛初名德勝趙副都御史載初名君琰羅侍郎玘  
初名紀方文襄獻夫初名獻科張文忠孚敬初名璉汪  
宗伯鏜初名鏜孫徐宗伯學謨初名學詩以字行者吳  
殿學名祐以字伯宗行劉學士名昆孫以字三吾行黃  
太常名湜以字子澄行練御史大夫名安以字子寧行  
李尚書名銅以字至剛行楊文貞名寓以字士奇行金  
文靖名善以字幼牧行王賓客名璡以字汝玉行羅侍

郎名簡以字汝敬行李祭酒名懋以字時勉行王安簡  
名倫以字宗彝行吳徵君夢祥以字與弼行吾鄉文待  
詔名璧以字徵明行

大臣復姓

大臣復姓者曹國公李文忠西平侯沐英平章何文輝  
都督徐司馬初俱國姓東勝侯汪興祖初張姓都督僉  
事謝彥初孫姓右都督寧正初韋姓禮部侍中黃觀初  
許姓左御史大夫景清初耿姓右都御史熊槩初胡姓



右副都御史陳泰初曹姓太常卿夏昶初朱姓工部尚  
書趙榮初王姓太常少卿陸欽初吳姓馬宗勉初周姓  
南戶部尚書潘蕃初鍾姓副都御史丘鼎初周姓尚書  
孟鳳左布政使孟麟初臧姓右都御史鄒昊初馬姓兵  
部尚書張經初蔡姓禮部左侍郎黃宗明初薛姓兵部  
左侍郎孫禴初葛姓少傅大學士呂本初李姓禮部尚  
書陸樹聲初林姓侍講邢一鳳初林姓叅政馬顧澤初  
顧姓郎中王周紹初周姓少師大學士申時行初徐姓

至於章恭毅綸魏恭簡校則身沒而其子孫始復為吳  
為李也若降將之賜姓名及正德中賜國姓於異典記  
之矣茲不復贅

懷恩本姓馬劉瑾本姓淡中貴之至賢至惡者也陶  
仲文本姓潘

冒國姓者

大臣而冒國姓者自國初改姓外如左都督朱寧初姓  
錢右都督朱安初亦姓錢平虜伯朱彬初姓江安邊伯

朱泰初姓許永壽伯朱德初姓裴名得一曰皮得左都督朱暉初姓劉左都督朱周初姓神右都督朱洪初姓張都督僉事朱琮初姓李

姓名非故

諸姓名皆賜者降虜也忠勤伯李賢初名綽羅同安侯和珍初名浩里浩沁恭順伯吳允誠初名巴圖特穆爾忠勇王金忠初名額森托噶順義伯羅秉忠初名阿爾噶實哩安順侯薛貴初名托和齊清平侯吳成初名瑪魯

忠勇伯蔣信初名巴爾台子嗣伯蔣善初名揚古齊斯  
恭順侯吳克忠初名伊勒都特穆爾

明縉紳奇姓

古今奇姓余嘗於宛委餘編略載之而不能詳今於凌  
氏所記拾本朝之可知者更志一二以俟增訂東華州  
人按察副使思忠吏部員外思誠給事中思恭御史郊  
駸鄭縣人府同知象閏南海人都御史詔鄧漳川人御  
史某終城固人鴻臚主簿其功戎嘉州人知縣府寧波

人知州國振叢文登人尚書蘭南昌人按察使貞吉弓  
江浦人御史元同長安人博士恕清交趾人邵武令蠡  
紅陽曲人鄖西丞尚朱通青州人州判官仁本鴻樂安  
人樂昌丞佑忠北流人郎中簡隆利津人御史英崇懷  
遠人都指揮使某彤全錦衣百戶寅沖香山丞循吏敬  
佟遼東人吏部郎中珍都督登清水人欽天博士子重  
從安陸州人知府龍繁昌人指揮貞容懷寧人進士若玉  
香山人孝子師偃松六合人府經歷庸臨桂人通判以

弘鄺石樓人府照磨瓊冬泗水人訓導青農涑水人知縣猷恭汝州人都御史昭卬蘭陽人府同知林重石州人舉人省雙陝西人僉事鳳鳴逢丹稜人指揮榮降阜平人都司經歷垣隨山東人按察司使贊山西人副使府祈山後人千戶璧訾諸城人光祿署丞宜山西人進士綬池涿州人進士龍同安人都御史浴德遲臨朐人兵部左侍郎鳳翔福山人太僕寺丞適夔合肥人雩都令信司山西人進士迪內黃人太僕丞恩廩和順人

衛經歷立道儀高密人侍郎智尚書銘危金谿人學士  
素右司郎中止邵武人御史行睦睢寧人給事中竑丹  
徒人進士煜岐解州人都御史亨給事中政斯垣曲人  
通判干鳳陽人指揮泰彌給事中堅袁州人關陝眉懷  
河人評事旭邳通州舉人贊舉人宣丕句容人訓導承  
文綦慈利人知縣沖大冶知縣禎移遷安人府照磨善  
睢龍溪人中書叅政稼卑樂城人訓導銘夷靜寧人指  
揮福之保昌人教諭輔其昌平人縣丞福鄭州人知縣

秉規夏邑人教授恂馳仁壽舉人九垓慈仁壽舉人訓導  
止汧河南人按察副使某奇宣寧舉人景中彰歸州人  
判官純熙河南人儀制郎中光宣大足人吏目厚蘄襄  
陽人市舶提舉航毗屑施舉人寵尸屑施人推官  
聰尼益都人教諭養德葵涿州人順慶府同知王  
縻上元人訓導煥資耒陽人知縣頤思東昌人建安丞  
志道怡耀州人訓導居敬衢江西人建陽丞通靡繁峙  
舉人子實誰南部人府照磨龍匙蒲州人判官廣蓬萊



人都指揮北鑰衣栖霞人衛經歷勉仁飛城固人戶部  
郎中瀑廬南城令坦於長樂人英山侯顯岷州人都御  
史教胥龍陽人布政司叅議必彰遽貴溪人永安令廷  
臣初潛江人叅政杲茹長沙人忠誠伯瑞戶部尚書泰  
素無錫人百四歲大中疏洧川人苑馬監正勤樗和曲  
人訓導本直閭陝西人布政使鉦提學副使潔四川人  
都御史東渠滕縣人訓科仲寧如司賓署丞學禮璩涇  
縣人知州新源大埔人戶部主事鎮海書鬱林人主簿

永琇餘博平人吏目惟興譽和順人濮州判官哲絮井  
涇人鄆縣丞樂巫合肥人都督同知凱廣德人御史繼  
咸吾開化人禮部侍郎紳區南海人叅政越呼綏德人  
叅政廷信戶部主事為卿太原人叅將良明涂江西人  
御史中丞節布政使觀須德州人御史瀾武進人僉事  
用賓父長興人知漳州府文通幸韶州人德興令皋  
安仁人叅政顥母劍州人太僕卿祥蓬州人御史恩大  
理評事德純扶安化人宣化令讓孤陽曲人中書舍人

忠塗高安人主事子源靖安人主事斗鎮進士鏜文祥  
漢州人副都御史澤民無陽曲人淳化縣丞能蕪平山  
人大使恕邾河東人渭南令安莆枝江人雩都令森湖  
連州人諒江照磨澄史歸信人海豐丞信孤濮州人德  
化丞啓捷為人松敷溪令季奴高郵人都指揮管西金  
山衛守備寧邾陝西人訓導仲德犀獲鹿人主簿希古  
梨宜黃人訓導公弁稽崐山人灤州守照雞遷安人苑  
馬監正濟時霓福山人雩都令濟懷日照人鴻臚序班

進忠淮臨汾人通州同知錫絳州人太平推官天相槐  
福清人都指揮寅枚吳縣人主事倫孝子應發萊四川  
教諭從善臺泰安訓導謙獻開洛陽人刑部尚書濟台  
當塗人長陽令鼎邵江寧人御史清當塗人太常丞博  
哈光州人教諭左才遷安人工部尚書寬哀萬安人推  
官賢又為按察使貞吉初姓回巢縣人知府謙知郟沭  
陽人進士旃莘歸安人進賢令野倫南海人左諭德文  
叙通叅以諒祭酒以訓順德人進士文銀故城人知州

嵩太原人主事鏡神陝西人涇陽伯英博羅人知縣受  
因新閩縣人教諭度溥合州人成安令忠厚春垣曲人  
遷安丞生物武昌人金溪丞仲和賓蒼梧人廣東提舉  
繼本慶德人永州推官禮人開州人百戶傑綰固始人  
都指揮桓塵莘縣人教諭洪經歷昂霄雲山東人叅政  
冒云東平人三河丞復誠君西平人漳州知州助勤曹  
縣人進士璽薰建寧衛千戶成懃瀏陽人梧州府同知  
進斤南海貢士其明忻博羅人教諭恭遜轅和順人司

儀署丞朴垣陽朔人戶部照磨廣詢雩都人進士芳敷  
滁州人保定推官鐸賁定遠人千戶隆論同州人長沙  
經歷中立門泰州人禮部尚書克新錦衣都指揮達尊  
繁峙人太湖丞德恩濰縣人司儀署丞光軒河曲人左  
都御史輓藩保寧人清遠令俊官長汀人汝山令謙端  
當塗人御史宏都御史廷赦寬漢陽人進士徹乾涇川  
人欽天監春官正蘭襄陽人應天尹以權達州人叅政  
興祖寒伏羌人教諭丹寧鄉人武陵令鳳翔雷州人武

陵令桂芳盤邵陽人武進丞銘冠日照人安塞丞端歡  
開封人豐城丞慨完遵化人歸善丞愚興化人指揮國  
仁奸山後人開平千戶闡權徐州人文華殿大學士謹  
朝鮮人光祿卿永均泉永城人平山主簿應醴然蔚州  
人衛經歷昌延大興人戶部侍郎祥韓城人御史茂給  
事中瑁堅秦州人博平令晟弦枝江人主簿尚強肩太  
和人貢士固賢平涼人具大使瑄年懷遠人戶部尚書  
富鄆豐城人刑部右侍郎懋卿玄遷安人知縣端芊掖

縣人安陽丞震千茂名人宜山典史萬仙河州人合江  
令名旃趙州人教諭英騫武陽人紹興府同知弘旋江  
都人貢士善駢大名人戶部主事恭橋曲沃人縣丞宗  
義堯安居人太僕丞卿瀏陽人叅議紹招廣寧人融縣  
令子萃廣東人蘇州府通判孟賢搖南平人句容教諭  
昌聊南昌令讓超宜黃人衛經歷令華寥鄭西人永春  
丞賁瓢太和人長陽典史某么湯陰人通州訓導謙定  
州人無錫丞稍安定人知州騰漢朝曹州人永豐丞泰



言巢新昌人御史筠鈔彰德人知府介臯清河人教諭  
王嵩滕縣人進士賓操淳梁人御史安又御史欽給事  
中守經糟鳳翔舉人士奇豪潁川人宣都令英戈梁縣  
人都督預景州人南京刑部尚書瑄又京師人運使九  
章知府九疇過山後人右都督興平湖人進士璘無錫  
人進士鶴阿山西人進士其麟和川人知縣賢河涇州  
人襄陽知府源娥福清人知縣喬軻簡州衛千戶興那  
宜賓舉人尚綱又舉人正球度磁州人南陽衛指揮五

常磁州人佗容縣進士盛蒼梧知州趙昌公安人巴縣  
令文光沂州人崇安丞崇揚處州人舉人賓東明舉人  
光休長揚州舉人輝倉遵化人訓導紀相上元人知府  
迪博平人叅政樞光陽人吏科都給事中懋長滑縣人  
指揮略蕓永福舉人清將如皋人邯鄲丞翔坊徐州人  
休寧丞蒙芒臨川人教授文鎮防寧縣舉人盛征祥符  
人都指揮使義三山人工部員外郎顯營祁州人知真  
州世寶英祁州人知縣繼善卿昆明人通判壽公安人

進士文端衡西平人知南安府岳寶應人工部主事宇  
生蓬萊人桐鄉令用和刑東鹿人晉府長史哲合水人  
長汀令惟一經廣西人叅議彥霖星沅江人叙州府推  
官奎靈陽谷人嶧縣令芳零橫州人博白令暢寧行唐  
人訓導全行青大寧人典史文盛陳州衛指揮若水陵  
高郵人涪州同知茂宣化人通道令滕吳川人同安丞  
文澤崩潛山人固始丞愈堅泰和人伏羌典史可立弘  
臨川人太平令啓冰繁昌人千戶如鑑天台人郴州守

伯傑由杞縣人主事禮門緱西華人曹州判官賢攸安  
平人御史承秋潁上人按察僉事茂油陵川人諒江守  
鳳開州人平涼通判恭甌貴溪人興化丞庚鎰南昌詩  
人績彪攸縣人新寧令堂浮永州人撫州照磨簡句伏  
羌人都指揮璽琴資縣人葭州守惟和臨石阡人平涼  
通判見城參平定州人連江令安鐔唐縣人太平守鑑  
尋按察使适欽吳縣人知府拱極壬遠安人杜寧令士  
亨莘縣人留守經歷佐郊蔚州人建平丞徽三應州人

祁門丞庸道澹朝陽人長陽令某淡廣西人汀州推官  
瑞潛高安人御史溟上上高人湖州府同知儒粘宜黃  
人東鄉令宣晉江人御史燦占桐柏人縣丞恩添沙縣  
人增城令禮韁定陽人叅議成文僉汝陽人教諭陽咸  
萊陽人進士懷良汜桂林人教諭勇瑞州千戶闕金邵  
武千戶英拱和順人進士北臨桂人叅議廷臣奉蘭陽  
人知縣科弭唐縣人溧水丞宦底考城人右都御史蘊  
是江陰人大使祐市井陘人龍虎衛經歷朝喜山後人

都督信理固安人教諭劇廣西人龍溪令英水鄞縣人  
邵武令甦民進士桓吳江人知州之文妣陝縣人米脂  
令庸道山西人襄陽府通判昂侶鄆城人戶部尚書鍾  
仕昌黎人陽信主簿鳳起達州人舉人鏜耳巴縣人醴  
陵令桓紫陝西人指揮承舜啓達州人雋都訓導韋爾  
寶坻人青州照磨名斐丹稜人御史俊樂安人僉事旻  
辰解州人御史昭尾曹縣人臨城主簿禮古陳州人戶  
部尚書朴山西人大理少卿鎔今梁山人按察副使之

賢堵山陰人叅政昇輔崇德人夔州府推官成長清人  
清平衛指揮德虎麟游人鄂嘉令臣五通海人宜城令  
淮午費州人舉人明臣迂高郵人文登丞春忤泰和人  
學士鳳蒲圻人主事瑜土山西人進士進良普漢陽人  
僉事仲賢垣曲人副使暉甫黔陽人弋陽令經六合人  
永豐令輟羽電白舉人關福禹臨洮人仁壽令裡宇涑  
陽人大名通判賓主益都人主事問禮愈曲江人興國  
丞德勤褚睢寧人主簿山俎磁州人員外郎琚慶都人

五臺令有用郎高陽人苑馬監正善又山西人經魁第  
昌黎人杭州通判泉璽湯谷人衛經歷書洗廣東人庶  
吉尚文且觀城人潞州判官簡買河內舉人源哈長葛  
人御史新民其子給事中民安闕回夷指揮銘隗清江  
人進士邦衡海廣東人戶部尚書淵電白人御史澄瓊  
山人都御史瑞宰保安人四川都指揮正采鳳陽人海  
寧衛指揮鳳翔靄順元宣慰使翠泌陽人邯鄲令都揣  
泌陽舉人本閬武進人上高縣丞立道憚武進人副使



魏郎中奎叅議紹芳青神人錦衣衛經歷彩宛望江人  
運使嘉祥苑寶慶人郎中困塞眉州人孝子衡曩宜都  
人吉安府經歷儀罕廣州右衛舉人言命又舉人高遠  
遂平人刑部員外郎志烜青海人長壽主簿霄散襄陽  
人江陰丞惟聰簡白山人知縣昱產瑞昌人主事麟蹇  
巴縣人少師義廣西右布政賢今按察使理典宛平人  
陵川令英單定遠人兵部尚書安仁展岐山人御史毓  
京衛人進士敏善大冶人懷慶府同知養鄆六安人臨

淮訓導福矯山東人蘇州知府順紹廣安舉人暘表番  
禺人教諭貢兆華亭人蓬萊丞元亨曉醴陵人塾江丞  
枝島垣曲舉人璞茆山東人僉事承慶漂陽人大理寺  
卿欽老徐聞舉人兆祥保通州人曲江令睿葆巢縣人  
高淳訓導光先寶廣東人攸縣丞敬早雲川人交趾府  
同知禮道河間人番禺令同浩黃陂人上猶巡檢本捨  
稅課大使敬庫融縣人上杭主簿繼生把陝西都指揮  
宗瓦土官女知府某仰長洲人大理寺丞瞻無為人左

布政使昇養壽州人護衛指揮雄涼州人都指揮賢賞  
會稽人理問震順德人通判璿莽平原人思南通判亨  
上江夏人左叅政志同知府觀陝西人進士志朗象臺  
人都察院司務清井邢臺人給事中田駙馬都尉源建  
德人校書郎一成幸吉安人刑部主事實永富順人進  
士穎省壽州人萍鄉令凱靖太平人撫州通判宣宛平  
人鴻臚卿洪洗順德人工部侍郎光南海都御史桂彥  
郎中桂奇苟

姓本多而  
具異記之

靈寶人御史甫蒲州人御史

汝安閬中人太僕卿穎眉州人僉事延庚紐介休舉人  
師鈕會稽人德安知府衍翰林待詔天錫按察副使清  
僉事緯九井陘人德興令焯酉武陵人廣信通判仁有  
塾江人苑馬寺監正終慶偶崑山人教授桓斗茶陵人  
府同知輔後當塗人陝西叅議敏后岷州人指揮能守  
源曲人蓬萊主簿育仁酒涇源人神木衛經歷好德  
丑三山人邵武通判慈首巴陵人龍江闕提舉謙長沙  
人汀州府推官得仁舊普安人苑馬寺監正惟賢壽蘄

州人進士儒諸暨人府同知成學咎山東人郎中誠三  
原人御史如思澈吳成舉人仁亮閃永昌人永州通判  
靄潁州人教諭名教授賢陝湖廣人知府茂檄開州人  
舉人皞廣宗舉人守道鳳貴州人都督朝印江人東鄉  
令儀庭重濱州人都陽令謙甯安肅人懷慶知府蕙凍  
睢州人利津令泰用陝州人遼州吏目夏縱蕭縣人日  
照訓導文冀鹿邑人工部左侍郎凱寶應人應天府尹  
綺東安人清源伯傑智元氏人進士審南平令佑義道

州人濮州學正森利博羅人府同知濟川河津人御史  
賓秘故城人郴州守心傳示臨潼人府同知郁類鼇山  
衛人訓導康次電白人都指揮攄帥安居人御史祥醴  
陵人國子監丞中臨川人知府機江陵人叅政蘭賁滁  
州人大名教授智位安掖人訓導安侍六合人綦江教  
諭懋意歐寧人獻縣訓導季暨崇安人進士文河東人  
達州守陽貴河南人錦衣指揮鐸汝陽知府仁豫蘄水  
人上饒令銑璩玉田人欽天監博士成暮臨城人御史

容度蓬州人給事中智具曲河人評事珪付大城人按察副使吉厲海州人都指揮達灤州人戶科都給事中汝進銳南充舉人廷緘世臨潁人刑部尚書家寶稅永壽人平涼府同知璿四川人進士新裔宣化人盧溪令璜昇湘陰人遂寧令忠閉石屏人知州魯惠安令禎銳武康人工部主事禎太臨桂人文昌令溥大永川人遠安令有崇直隸人戶部左侍郎亨會高昌人雱都丞同泰福寧人安遠令行實鈞州人湘潭令穀蓋興化知府

天麟祭藍水人衡府紀善節蒯壽州人刑部主事全南  
樂人太僕寺丞信介湖廣人德慶知州壽解縣人知府  
一清拜建水人醴陵教諭完賣羅城人寧德丞廷傑膠  
州人宜黃令芳菁蔚州人汀州巡檢端邁慈利人江西  
右叅議文麟代山後人西安衛指揮陞愛融縣人永昌  
通判莫助能音耐如川人崇德丞以文南寧人始興令麋  
俾奴代切滁州人永豐令隆興化人廣東都指揮俊慎歸  
安人御史蒙印永平人太和令璽六合人寶慶府同知



寶信武邑人遼州判官時順江夏人進士境韻清源舉  
人鼇鎮常山人開縣令某舜慶都人欽天博士用禹員  
錦州人禮部郎中紀咸陽人霍州知州鼎訓柏鄉人袁  
州府教授濬問寶應人貢士智郡大寧人餘干令敬頓  
直隸人進士銳憲荊州人府經歷章漫忻州舉人智寸  
浪穹人梓潼令居敬灌南海人江陵主簿謙貫臨武人  
橫州守元凱漢道州人鹽井提舉邦傑爨雲南人郴州  
判官奐歸州人知州忠武進人筠連令進練長洲人春

坊司直郎塤御史綱新淦人御史大夫子寧戰祈縣人  
揚州知府慎蘄州人南京戶司務符院振武人叅政賓  
線日照人分水令雍山東人甘肅副總兵補袞弁長寧  
人監利訓導志中釧閬中人撫州照磨國雲南人貴陽  
丞佩射衡陽人鹽井衛教授兌化蘄州人襄府左長史  
之行赦中年舉人敬亞華陰人平陰丞吉夜山東人光  
祿寺丞珠太原衛指揮景光亢臨汾人四川左布政使  
思謙况靖安人蘇州知府鍾高安人按察僉事照郎中

真叅政叔祺望河南人常州推官增遠安人進士子威  
暢河津人御史亨隴西人按察僉事華曠德州人餘干  
令彥溫醴陵人解元宗舜鄺宜章人兵部尚書埜任丘  
人瑞州守鐸翰林侍講灝光祿卿沛旺福州衛千戶斌  
妙河州衛指揮齡肖褒城人解元靖正合肥人大同教  
授復姓南海人貢士秉恭令新昌人御史曦懋內丘人  
山西叅將國輔豆昆明人河南衛千戶長寧就涑縣人  
西寧衛指揮大勲漏山陰人貢士瑜宿夾江人刑部員

外進掖縣人行太僕卿應叅又隴西人豹韜衛經歷尚  
珍者漢州人龍南丞秉彝秀石泉人禮部郎中芳茂安  
化人御史彪茂山衛人山東副總兵鍾鬬平陽人府經  
歷鳳闕四川人知府繼禹鑒徐州人兵馬指揮善牧弋  
陽人興化推官義紹興進士相木瑞安人國子學錄景  
方錢唐人解元訥沐定遠人西平侯英伏刑部侍郎伯  
安鞠和州人進士祥鞠楚雄人邳州守以信麴貴州人  
長沙通判信竹昌黎人太僕少卿祥服襄垣人扶溝令

用休睦平南人教諭堅夙松溪人本縣令道暹祿武陟  
舉人存福山後人都督僉事時復扶風人典史揚清鹿  
鄭州人邯鄲令秀太康人長興令顯肅歸善人教諭灝  
濮鳳陽人樂浪公英邵武人都督溫其當塗人翰林編  
修韶速饒州衛千戶斌僕桂林人善化訓導淮璞城固  
人知縣俊獨華州行人善赤水衛人岳州守賢續翼  
城人進士旻東岐山人萬載令清安東令贊御史春沃  
蕭山人溫縣令墅定海人御史類逯錢塘人武進教諭

宏曲汝陽人曲陽令子得王彰縣人眉州判官恩粟長子  
人戶部尚書恕貴陽人工部員外林督全州人歸善丞仲  
美浴略陽人通判沂篤建水人順義丞百誠嶽鄭州人上  
杭令崇榆次人通渭令思忠朴瀋陽人新安衛指揮淳用  
金鄉人中利巡檢巖漆江寧人叅議汝翼南昌人叅議彬  
鄧渭南人膠州判官用義栗濬縣人太常丞景初長治人  
兵部右侍永祿乙河南人吏部主事瑞蜜筑安撫使定曲  
陽谷人鳳陽府同知鏞宓慈溪人蘇州檢校大麒佛封丘

人安慶衛千戶正都固始人寧波知府馴率高昌人平  
度州判官慶壹興化人府經歷震昌一鄧州人贊皇令  
洪延川人靈壽丞炫七施州衛人永春訓導希賢采宣  
化舉人文倫汨潯陽人彭澤主簿澄劇藁城舉人遲鬱  
山東人潁川衛知事讓乞南京人泌水令賢廣西人吳  
川令住蔚合肥人禮部侍郎綬朝邑人禮部右侍能宣  
武人太僕少卿元康厥井陘人華州守惟明骨歸德人  
學正恭闕長洲人禮部郎中成章河南人平涼知府清

越合州人進士堅揭廣昌人兵部左侍稽弘文館學士  
樞忽山西人戶部郎中鳴月巴縣人武昌訓導文憲贛  
縣人江油令輝字隴西人四川僉事曰山後衛人都督  
僉事福褐北流舉人奎筮相城人沂州守貴湖口人給  
事中東光達西域人御史蕪善丹徒人郎中毅任縣人  
提學副使其道脫星子人廉州知府因遂寧人都指揮  
綱薩閩縣人禮部右侍郎琦榻保章人刑部主事明德  
搭陽人教諭恩滑太倉人弋陽令泉餘姚人南昌知府



浩西安解元撫頤易州人知縣質捌石屏人利東巡檢  
忠八江寧人禮部主事通撒高郵人進士祥別大同人  
醴泉令俊河南人魏縣教諭叢折泗州人中府斷事克  
恭列固始人長樂丞文邦捏河州人平鄉令經節平涼  
人信豐指揮鐸鐵鄧州人兵部尚書鉉永昌人進士篆  
俱漂陽人戶部尚書斯姚州人進士惟賢漂山西人鄧  
州守昇才東昌人分宜令金雄三原人刑部尚書僉右  
副都御史昂涇陽人副都御史遵藥山東人僉都御史

理鄂確山人江陰丞隆博雲和人涇縣教諭某洛清源  
人叅將忠糕平度人南平訓導芳籍內黃人茶陵州守  
貫徽伯延津人鴻臚鳴贊希益蒲州人指揮効忠赫大  
名人御史瀛麥連山人工部尚書志德南海人按察僉  
事春芳赤曲沃人汶上丞從周格石阡人行都司經歷  
化革四川人員外郎從時迺如臯人翰林編修原霖鴻  
臚序班績策賀縣人長沙縣丞敏百贛州千戶恭貊太  
和人內黃令安澤陳州人府同知義亦山東人江西叅


將孔昭碧涿州人大名訓導潭惕龍溪人瀧水令龍驤  
興化人光祿卿鏞弋代州人交趾右布政使謙景州人  
南京刑部尚書瑄力臨淄人鄖陽令魁墨高陵人兵部  
右侍麟翼秦州人清河教諭琛直容縣人河源令凌霄  
勒曹縣人主事璽黑山後人總兵都督僉事春息博興  
人知縣昭植湖廣人文昌令軒默新和人扶風丞思道  
習新喻人詹事嘉言廬陵人國子司業孔教汲五樓人邯  
鄲丞時學立蘭陽人右布政使述及交河人戶部左侍郎

宦襲歷城人揚州府訓導曷戰簡州人叅議汝止疾清  
遠人貢敬合大同人雞澤令舉闔隨州人御史勝先納  
什邡人常德衛千戶臺接莒州人知縣武帖馬平人龍  
川令晏法丹徒人保定通判愷甲邢臺人鴻臚序班總  
複姓至我朝則益少矣蓋多去繁而從省故也以是悉  
志之東方栖霞人石屏州守正丹徒人平南訓導魏公  
冶高密人右僉都御史志公孫鹽城人安吉令讓司馬  
山陰人少詹事恂福建副使聖司徒日照人新會訓導

綬司空福山人定海令禧諸葛太平人陝西叅議伯衡  
會稽人給事中峴閭丘長洲人瑞州府推官王呼延四  
川人叅將迪西門日照人涪川丞炳淳于黃州人主事  
士瑾固始人南京上林苑丞重申屠長洲人翰林修撰  
衡崇德人御史祺聞人餘姚人進士恪善晟謨郎中  
玘副使銓尚寶丞德行端木句容人尚書以善漂水人  
翰林待詔孝文侍書孝思敬皆完顏廊州英山令章皇  
甫遼海人指揮知事斌長洲人知府錄僉事孝沔府同

知瀛歐陽永新人御史子韶城武人行省郎中萃叅政  
恭沔陽人考功郎中謙桂陽人泉州知府復太和人僉  
事哲吏部侍郎鐸禮部尚書德僉都御史重工部侍郎  
塾太僕卿衢俱太和人水丘台州舉人進又舉人曦爾  
朱富平解元欽宇文陝西人鍾叅政臨安人通判溥夏  
侯宜黃人內黃令某上官浦城知縣子榮主事德南城  
人評事民望按察副使民詹長孫慶元人鴻臚寺丞義  
仲長清浪衛人高安令備璫州府通判賢慕容湘陰人

龍泉丞傑第五淳化人當塗令寧三水人夔州府通判  
德令孤洪洞人郎中一槐濮陽廣德州人進士恭寧陽  
丞瑾戶部照磨鉞上虞丞傅餘杭令傅獨孤太和人禮  
部郎中樂善樂安人潼川州守一敬尉遲鞏昌人興化府  
通判淵鐵力句容人鴻臚序班必失



弇山堂別集卷十九